

Pregled Dokumentata | Broj 12/21

Početna (/) / Dokumenti (/Docs/) / Službene novine Kantona Sarajevo (/Docs/Drzavni) / Dokumenti pregled

Službene novine Kantona Sarajevo, broj 12/21

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09), člana 25. Statuta Općine Centar Sarajevo - Prečišćeni tekst ("Službene novine Kantona Sarajevo", broj 23/04) i člana 171. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj 38/14 - Prečišćeni tekst, 38/16, 44/17 i 28/18), Općinski načelnik donosi

PRAVILNIK

O KRITERIJIMA I RASPODJELI NOVČANIH SREDSTAVA ZA DODJELU JEDNOKRATNE NOVČANE POMOĆI ZA DJELIMIČNU SANACIJU INDIVIDUALNIH STAMBENIH OBJEKATA

Član 1.

Ovim Pravilnikom o kriterijima i raspodjeli novčanih sredstava za dodjelu jednokratne novčane pomoći za djelimičnu sanaciju individualnih stambenih objekata (u daljem tekstu Pravilnik) uređuju se uslovi, kriteriji i način dodjele jednokratne novčane pomoći za djelimičnu sanaciju legalno izgrađenih, neuslovnih individualnih stambenih objekata lica i porodica u stanju socijalne potrebe po IMG standardu - propisani stambeni minimum (u daljem tekstu: jednokratna pomoć).

Član 2.

(1) Cilj lokalne zajednice je da kroz djelovanje u sistemu socijalne zaštite izdvajanjem budžetskih sredstava pomogne lica/podrođice u stanju socijalne potrebe koji nemaju individualni stambeni objekat koji zadovoljava minimalne uvjete za život.

(2) Socijalnom potrebom u smislu zakona smatra se trajno ili privremeno stanje u kome se nalazi određeno lice ili porodica, prouzrokovano ratnim događajima, elementarnim nesrećama, opštom ekonomskom krizom, psihofizičkim stanjem pojedinaca ili drugih razloga, koji se ne mogu otkloniti bez pomoći drugog lica.

Član 3.

Poslove u vezi ostvarivanja prava propisanih ovim Pravilnikom obavlja općinska služba nadležna za poslove socijalne zaštite.

Član 4.

(1) Sredstva sa budžetske pozicije predviđena za ove namjene dodjeljuju se na osnovu javnog poziva koji se objavljuje na web stranici Općine i ostaje otvoren do kraja tekuće budžetske godine ili do utroška planiranih budžetskih sredstava.

- (2) Jednokratna pomoć utvrđena ovim Pravilnikom dodjeljivat će se na osnovu podnesenih zahtjeva, a u skladu sa objavljenim javnim pozivom.
- (3) Zahtjevi za ostvarivanje prava na jednokratnu pomoć podnose se službi nadležnoj za poslove socijalne zaštite putem protokola Općine.
- (4) Zahtjevi će se rješavati po redosljedu podnošenja.
- (5) Služba je dužna u roku od 60 dana od dana podnošenja riješiti zahtjev i o tome obavijestiti podnosioca.
- (6) Dokumentacija koju je potrebno priložiti uz zahtjev po objavljenom javnom pozivu biti će navedena u posebnom obrascu koji će biti dostupan na web stranici te info-pultu Općine Centar Sarajevo. Zahtjev za ostvarivanje prava čini sastavni dio ovog Pravilnika i isti se može mijenjati neovisno od odredaba Pravilnika.

Član 5.

Uvjeti za ostvarivanje prava na jednokratnu pomoć su:

- a) Da podnosilac zahtjeva ima najmanje godinu dana prebivališta na području općine Centar Sarajevo prije podnošenja zahtjeva;
- b) Da primanja porodičnog domaćinstva podnosioca zahtjeva ne prelaze iznos jedne prosječne plaće ostvarene u FBiH prema posljednjim statističkim pokazateljima;
- c) Da podnosilac zahtjeva stanuje u objektu koji je predmet sanacije;
- d) Da je stambeni objekat koji je predmet sanacije legalan;
- e) Da je stambeni objekat koji je predmet sanacije neuslovan za stanovanje te da se isti nalazi na području općine Centar Sarajevo;
- f) Da stambeni objekat koji je predmet sanacije nije uništen ili oštećen uslijed ratnih dejstava ili nedomaćinskog ponašanja vlasnika objekta;
- g) Da se radi o objektu individualnog stanovanja;
- h) Da podnosilac zahtjeva za navedeni objekat nije ranije ostvarivao ovu vrstu pomoći putem nadležne službe.

Član 6.

- (1) Visina jednokratne pomoći u smislu ovog Pravilnika iznosi do 50% iznosa sredstava potrebnih za sanaciju legalno izgrađenog, neuslovnog individualnog stambenog objekta, s tim da odobrena jednokratna pomoć ne može preći iznos od 5.000,00 KM.
- (2) Pravo na jednokratnu pomoć za sanaciju određenog stambenog objekta može se ostvariti jedanput u periodu od pet godina.

Član 7.

- (1) Općinski načelnik, imenuje stručni tim koji broji tri člana: socijalnog radnika, diplomiranog pravnika i državnog službenika građevinske struke.
- (2) Stručni tim, nakon upotpunjenog zahtjeva za dodjelu jednokratne pomoći, vrši terenski obilazak i sačinjava zapisnik u

kojem konstatuje:

socio - anamnestičke podatke o domaćinstvu,

uslovnost/neuslovnost individualnog stambenog objekta, da li je započeta sanacija, opisno šta je urađeno i šta treba još uraditi, vrši procjenu i daje prijedlog o visini jednokratne pomoći za djelimičnu sanaciju neuslovnog individualnog stambenog objekta po IMG standardu.

(3) Nakon provedenog postupka te sačinjenog Zapisnika nadležna služba upućuje Općinskom načelniku prijedlog o dodjeli jednokratne pomoći.

(4) Općinski načelnik odlučuje o visini jednokratne pomoći te sklapa Ugovor sa korisnikom sredstava.

(5) Nadležna služba će posebnim aktom obavijestiti podnosioca zahtjeva ukoliko nisu ispunjeni uvjeti za dodjelu jednokratne pomoći u skladu sa odredbama ovog Pravilnika.

Član 8.

(1) Uplata sredstava izvršit će se putem nadležne službe za finansije na tekući račun korisnika sredstava u roku od 10 dana od dana potpisivanja Ugovora.

(2) Korisnik sredstava je dužan dostaviti finansijski izvještaj (računi, otpremnice, fotografije) o namjenski utrošenim sredstvima u roku od 60 dana od dana uplate sredstava, odnosno do kraja tekuće budžetske godine u kojoj je ostvareno pravo.

(3) Stručni tim će izvršiti kontrolu izvršenih radova na licu mjesta i o tome sačiniti službenu zabilješku.

(4) Ukoliko korisnik sredstava ne dostavi finansijski izvještaj sa svom pratećom dokumentacijom o namjenskom utrošku sredstava dužan je izvršiti povrat istih uplatom na račun Općine Centar Sarajevo, u suprotnom će se sredstva potraživati putem nadležnog suda.

Član 9.

Izuzetno od odredaba ovog Pravilnika, Općinski načelnik može odobriti jednokratnu pomoć u maksimalnom iznosu do 2.500,00 KM licima i porodicama koje su se trenutno našle u stanju socijalne potrebe koja je uzrokovana elementarnom nepogodom (požar, poplava i sl.) što se dokazuje uvjerenjima nadležnih službi.

Član 10.

Ovaj Pravilnik stupa na snagu narednog dana od dana objavljivanja u "Službenim novinama Kantona Sarajevo", a isti će biti objavljen i na oglasnoj ploči i web stranici Općine Centar Sarajevo.

Član 11.

Stupanjem na snagu ovog Pravilnika prestaje da važi Pravilnik o raspodjeli novčanih sredstava za dodjelu jednokratne novčane pomoći za djelomičnu sanaciju individualnih stambenih jedinica lica i porodica u stanju socijalne potrebe broj 10-14-478/19 od 16.05.2019. godine.

Broj 09/3-03-50/21
04. marta 2021. godine
Sarajevo